

- प्रधानमंत्री नरेन्द्र मोदी साल 2047 ताई विकसित भारत रा लगस ने हासिल करण रा मकसद ऊं नौजवाना रा विचार जाणण सारू काले एक कार्यक्रम री सरूआत करेला।
- प्रदेशभर मांय आज पल्स पोलियो अभियान रे तैत पांच साल ताई रा टाबरां ने पोलियो री खुराक पिलाई ज्यी-आवता दो दिन चिकित्सा दल घर-घर जा र पिलावेला दवा।
- सुखदेव सिंह गोगामेड़ी हित्याकांड रा तीन आरोपियां ने करी ज्या गिरफ्तार- मास्टरमांड री पिछाण मांय जुटी पुलिस।
- प्रदेश मांय केई ठौड़ां कमती रा तापमाप मांय कमी आवण ऊं करडी ठण्ड रो दौर चाले।।

000

प्रधानमंत्री नरेन्द्र मोदी साल 2047 ताई विकसित भारत रा लगस ने हासिल करण रा मकसद ऊं नौजवाना रा विचार जाणण सारू काले एक कार्यक्रम री सरूआत करेला। नीति आयोग रा मुख्य कार्यकारी अहलकार बी.वी. आर. सुब्रमण्यम आज नुवी दिल्ली मांय कह्यो के ई कार्यक्रम मांय कोई सात सौ विश्वविद्यालयों रा कुलपति अर संस्थाना रा प्रमुख मौजूद रेवेला। वणा कह्यो हर राजभवन मांय विकसित भारत माथे एक दिन री कार्यशाला करी जावेला। श्री सुब्रमण्यम कह्यो के देश रा पढेसर ई विकसित भारत रा सब ऊं मोटा वाहक होवेला। वणा कह्यो के पढेसरा रा विचारा ने विकसित भारत रा नजरियां मांय भेळा कर्या जावेला।

000

रक्षामंत्री राजनाथ सिंह आज नुवी दिल्ली मांय राजघाट कने महात्मा गांधी री मूरत रो अनावरण कर्यो। ई मौके वणा कह्यो के गांधी अजे ई प्रासंगिक बण्योडा है अर वां री शानदार मोटी मूरत री थापना एक सरावना जोग कदम है। श्री सिंह कह्यो के महात्मा गांधी दुनिया भर रा लोगां रा हिरदा मांय आपरी ठौड़ बणायी है। रक्षा मंत्री कह्यो के प्रधानमंत्री नरेन्द्र मोदी महात्मा गांधी रा आदर्शा ने आपरा जीवन मांय उतार्या है अर देश री जनता री सेवा करी है।

000

आज अंतर्राष्ट्रीय मानवाधिकार दिवस है। मौलिक हकां, स्वतंत्रता अर समानता ने बधावो देवण सारू आखी दुनियां मांय ओ दिन मनायो जावे है। ई मौके उपराष्ट्रपति जगदीप धनखड़ कह्यो है के मानवाधिकारां रा प्रसार अर मजबूती सारू देश मांय चौखो आधारभूत विकास जरूरी है। नई दिल्ली मांय रा भारत मंडपम मांय व्हा कार्यक्रम मांय श्री धनखड़ कह्यो के कानून सब ऊं ऊपर है अर सब सारू बरोबर है। इण ऊं ई सगळा ताई न्याय री पहुंच होवे है। उपराष्ट्रपति कह्यो के साफगोई अर जवाब देह शासन बन्दोबस्त मानवाधिकारां ने बधावो देवण रो मापदंड है। वणा कह्यो के साफगोई अर जवाबदेह शासन मौजूदा सरकार री कार्यशैली रो हिस्सो है अर इण ऊं मानवाधिकारां ने बधावो मिल्यो है। ई मौके राष्ट्रीय मावनाधिकार आयोग रा अध्यक्ष रिटायर्ड न्यायाधीश अरुण कुमार मिश्रा कह्यो के पूरी दुनिया मांय आतंकवाद रे कारण लोगा रा मानवाधिकारां रो गहरो उल्लघन व्ह्यो है।

000

पैला खेलो इंडियां पैरा गेम्स आज ऊं नुवी दिल्ली मांय सरू व्हा। आठ दिन ताई चालण वाळा ई खेल आयोजन मांय सर्विसेज स्पोर्ट्स कंट्रोल बोर्ड समेत 32 राज्यां अर केंद्र शासित प्रदेशां रा एक हजार चार सौ ऊं बत्ती खिलाड़ी हिस्सो ले रह्या है। पैरा गेम्स मांय भेळा खिलाड़ी सात खेल मुकाबलां एथलेटिक्स, निशानेबाजी, तीरंदाजी, फुटबॉल, बैडमिंटन, टेबल टेनिस अर भारोत्तोलन मांय हिस्सो लेवेला। खेलो इंडिया पैरा गेम्स रो मकसद पैरा एथलीटां ने आप रा हुनर ने दर्शावण अर आप रा कैरियर ने विकसित करण रो मौको देवणो है।

000

प्रदेश मांय आज ऊं सरू व्हा उपराष्ट्रीय पल्स पोलियो अभियान रे तैत पांच साल ताई रा टाबरा ने पोलियो री खुराक पिलाई ज्यी। टीकाकरण बूथां माथे संवारा आठ बज्या ऊं सरू व्ह्यो ओ अभियान सिंज्या पांच बज्यां ताई चाल्यो। पोलियो खुराक ऊं बच्चोडा टाबरां ने चिकित्सा दल काले अर परसूं घर-घर जा र दवा पाई जायेला। जयपुर जिला मांय अभियान री सरूआत राजकीय शहरी प्राथमिक स्वास्थ्य केन्द्र आदर्श नगर मांय व्ही। मुख्य चिकित्सा अर स्वास्थ्य अहलकार डॉ. विजय सिंह फौजदार बतायो के अभियान रे दौरान पांच लाख पचास हजार ऊं बत्ती पात्र टाबरा ने पोलियो री खुराक पाई जावेला। बूंदी मांय आज पल्सपोलियो अभियान री सरूआत जिला सफाखाना मांय टाबरा ने पोलियो की खुराक पिला र करी ज्यी। भरतपुर जिला मांय ई पल्स पोलियो बूथां माथे टाबरा ने दवा पिलाई ज्यी। केई बूथां माथे टाबरा ने ईनाम मांय चॉकलेट अर गुब्बारा ई देरी ज्या।

सुखदेव सिंह गोगामेड़ी हत्याकांड रा दो शूटर समेत तीन ईल्जामियां ने पुलिस पकडन मांय कामयाबी हासिल करी है। एस.आई.टी. रोहित राठौड़ अर नितिन फौजी ने काले दिल्ली पुलिस री मदद ऊं चंडीगढ़ ऊं पकड़ण मांय कामयाब व्ही। इण ऊं पैला जयपुर पुलिस हरियाणा मांय महेंद्रगढ़ ज़िला रा ऊं आरोपियां रा मददगार रामवीर सिंह ने गिरफ्तार कर्या। पुलिस महानिदेशक उमेश मिश्रा आरोपियां ने गिरफ्तार करण माथे पुलिस टीम ने बधाई दी है। श्री मिश्रा इण ने अन्तर्राज्यीय पुलिस तालमेल अर मदद रो चोखो उदाहरण बताया है। डीजीपी मदद सारू दिल्ली अर हरियाणा पुलिस ने ई धन्यवाद दियो है। अतिरिक्त पुलिस महानिदेशक अपराध दिनेश एम.एन. अर पुलिस कमिश्नर बीजू जार्ज जोसेफ खबरनवीसा ऊं बतळ मांय पूरा ऑपरेशन री जाणकारी देवता बतायो के आरोपियां ने गिरफ्तार करण रे पछे वां ऊं पूछताछ करी जा रही है।

ध्यानजोग है के 5 दिसम्बर ने दो शूटर जयपुर रा श्याम नगर मांय रहवास माथे अंधाधुंध गोलीबारी कर ने श्री राष्ट्रीय राजपूत करणी सेना रा राष्ट्रीय अध्यक्ष सुखदेव सिंह गोगामेड़ी री हित्यां कर दी ही।

000

राजस्थान समेत पांच राज्यां मांय व्ह्या विधानसभा चुनाव रे पछे छत्तीसगढ़ मांय सरकार बणावण री प्रक्रिया सरू व्हे ग्यी है। पैली रा केंद्रीय मंत्री विष्णुदेव साय छत्तीसगढ़ रा आगला मुख्यमंत्री व्हेला। रायपुर मांय भारतीय जनता पार्टी रा नुवां चुणी ज्या विधायकां री बैठक मांय आज ओ फ़ैसलो लीरी ज्यो। केंद्रीय पर्यवेक्षका अर्जुन मुंडा, सर्वानंद सोनोवाल अर दुष्यंत कुमार गौतम री मौजूदगी मांय वणा ने भा.ज.पा. विधायक दल रो नेता चुणी ज्या। भाजपा री छत्तीसगढ़ शाखा रा पैली रा अध्यक्ष विष्णुदेव साय राज्य री कुनकुरी विधानसभा हलका ऊं विधायक चुणी ज्या है। 90 सीटां री विधानसभा मांय भारतीय जनता पार्टी 54 सीटां जीती हैं। उठीने राजस्थान मांय ई सरकार बणावण री कवायद सरू व्हे ग्यी है। भारतीय जनता पार्टी रक्षा मंत्री राजनाथ सिंह, राज्यसभा सांसद सरोज पाण्डे, राष्ट्रीय महासचिव विनोद तावडे ने पर्यवेक्षक नियुक्त कर्या है। भाजपा विधायक दल री बैठक रे पछे विधायक दल रा नेता रो नाम तैय कर्यो जायेला।

000

केंद्रीय मंत्री पीयूष गोयल आज दौसा जिला मांय मेहंदीपुरबालाजी पहुच्यो। श्री गोयल बालाजी महाराज री पूजा करी। ई मौके केंद्रीय मंत्री रे साथे वां री जोडायत ई मौजूद री। मिन्दर रा सचिव एम.के. माथुर ने श्री गोयल री अगुवाई करी।

000

प्रदेश मांय केई ठौड़ां कमती रा तापमान मांय कमी आवण ऊं करडी सर्दी रो दौर चाले। बीत्यां चौबीस घंटां मांय दस ऊं बत्ती ठौड़ां माथे कमती रो तापमान 8 डिग्री सैल्सियस ऊं नीचे दर्ज करी ज्यो। सिरोही जिला रा पर्वतीय सैलाणी ठौड़ माउन्टआबू मांय आज एक डिग्री सैल्सियस तापमान दर्ज करी ज्यो, और ब्योरो म्हारा खबरनवीस ऊं

मौसम मेहकमा मुजब आज सीकर रा फतेहपुर मांय कम ती रो तापमान 4 दशमलव 8 डिग्री सैल्सियस दर्ज करी ज्यो। सीकर मांय 5 दशमलव 5, चूरू अर हनुमानगढ़ रा संगरिया मांय 7, पिलानी, अलवर अर जालौर मांय कोई साढे 7 डिग्री सैल्सियस रे आरे सारे कमती रो तापमान दर्ज करी ज्यो। वठे ई दूजा शहरां मांय औसत कमती रो तापमान 13 डिग्री सैल्सियस ऊं नीचे रह्यो। मौसम केन्द्र जयपुर आवण वाळा पांच-छ दिनां माय मौसम सुखो रहवण री आस जतायी है।

000

जयपुर रा जवाहर कला केन्द्र मांय आज ऊं **जयरंगम उत्सव** री सरूआत व्हे री है। कला संस्कृति मेहकमा कानी ऊं व्हे रिया ई महोत्सव मांय सात दिनां ताई 16 नाटकां रो मंचन कर्यो जावेला। ई मौके नामी रंगकर्मी हबीब तनवीर रा सफरनामां ने दर्शावती नुमाईश ई लगायी ज्यी है। महोत्सव रे दौरान थियेटर ऊं जुड्या जाणकारां साथे बतळ रा ई कार्यक्रम व्हेला।

000

इंडोनेशिया सरकार भारत समेत 20 देशां रा सैलाणीयां ने मुफ्त आवण रो वीजो देवेला। ओ प्रस्ताव सैलाणियां री तादाद बधावण अर माली बन्दोवस्त री बढवार दर ने तेज करण रा मकसद ऊं करी ज्यो है। इंडोनेशिया सरकार रो अंदाजो है के मुफ्त एंट्री वीजा ऊं घरू उपभोग बढेला अर डिजिटल अर्थव्यवस्था ने बधावो मिलेला। अजे ई मलेशिया अर थाइलैंड सारू ई भारतीय सैलाणीयां ने फ्री एंट्री वीजा मुहैया है।

000

भारत अर दक्षिण अफ्रीका रे बीचे तीन मैचां री टी-20 क्रिकेट श्रृंखला रो पैलो मैच आज सिंज्या साढे सात बज्या डरबन मांय खेल्यो जावेला। सूर्यकुमार यादव री कप्तानी मांय युवा टीम मांय केई नुवां खिलाडी भेळा है। टीम मांय भेळा खिलाडियां रे दक्षिण अफ्रीका मांय टी-20 मैच खेलण रो ओ पैलो मौको है।